

TE HOHEURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti.
i te mau fenua Sotaiete, i te mau avae atoa
Te hoo e piti farane i te matahiti hoê.

Nu. 12.

Ditema 1930.

Mat. 24.

To Iosepha Semita Itoito

O teie ia te haamataraa o te hoê mau haapiiraa i faaineinehia e te
Epitetopo Rahi no te mau Diakono; Ua faaauhia ei reô Tahiti e Edua.

(Maa parau iti tuatapapa) Ua fanaubhia Iosepha Semita, te peropheta matamua i teie mau mahana hopea nei, i te 23 no Ditema, M. 1805, i te oire ra, o Saronā, i te matainaa ra, o Winetora, i te tufaa fenua ra, Veramona. Ua ite oia i to'na orama matamua o te Metua e te Tamaiti i te M. 1820, e ua fâ maira te melahi o Moroni ia'na i te 21 no Setepa i te M. 1823. Ua farii oia i te mau api auro no te Buka a Moramona, e ua oti te iritiraa i te 22 no Setepa i te M. 1827. Ua faatoroahia oia e Ioane Bapetizo i te Autahuāraa a Aaronā i te 15 no Me i te M. 1829, e i te avae Tiunu i te matahiti 1829. Ua faatoroahia oia i te Autahuāraa a Melehizedeka e na melahi, oia hoi, o Petero e o Iakoba e o Ioane, e ua faatiahia te Ekalesia i te 6 no Eperera i te matahiti 1830. E rave rahi te mau heheuraa faufaa rahi roa ta'na i farii, e na oti ia'na te hoê ohipa maere i te faahoīraa mai e te poro haereraa i te Evanelia, e i te hopea, mai te tia ore, ua taparahi-pohe-roa-hia oia e te hoê taata

orurehau i te fare tapearaa i Karatage i Ilinoi i te 27 no Tiunu i te matahiti 1844.

I to'na matahiti iva, ua pohe Iosepha i te ahu typhus, e i te hopea ua tae ia i roto i te ivi o To'na avae, mamae rahi roa aéra. Ua tae mai te taote, tapu ihora oia i te hoé tapurāa, e vau initi te roa, i ropu i te turi e te momoa avae. Ua manuia teie no te taime poto anaé, e i reira ua tapitihia te tapurāa, e i teie taime, ua tapuhia e tae noa tuiti i te ivi. Ua ravehia teie mai te haamarū ore i te mauui, aore te raau faataotorāa i itehia i te reira taime. I te hopea, ua parau mai te taote, ia tapu-faarue-hia to'na avae e tia'i. Aore to Iosepha metua vahine i faatia, no reira, ua tatoruhia te tapurāa. I teie taime ua ravehia te hoé tapurāa fifi roa, ua hinaaro te taote ia taamu ia Iosepha i nia iho i te roí ia ore oia e hauti. Ua parau maira Iosepha e, "Eiaha, e mea ohie ia'u ia faaoromai, mai te mea e, aita vau i taamuhia."

Ua parau mai te taote, "Na reira, e inu anei oe e maa aya iti, e aore rá te uaina ia haamamae rii i te mamae?"

Pahono maira Iosepha, "Eita, eiaha e hoé topata, terara e parahi to'u metua tane i nia iho i te roí nei e tapea ia'u, e i reira vau e rave i te mau mea atoa e tia'i no te iritirāa i teie nei ivi."

Ua haamata te taote i ta'na tapurāa i te hourāa i te hoé apoo i roto i to Iosepha ivi avae, na teie pae atu nei i te vahi i māhia ra e na tera pae atoa mai, e ia oti, ua rave oia i te faahohoni e ua ofati i te ivi i te vahi ino. I te fatirāa o te tufaa matamua ua pii Iosepha no te mamae rahi, tirara, faaitoito ihora oia. Ia oti te tufaa toru i te iritihia ua tahe-puai mai te toto, i roa ihora te roí, na maheahea Iosepha, e ua tahe te hou no to'na mata, e mamae rahi roa to'na. Ua faaotihia te tapurāa, e ua huru maitai to'na

avae. I te hopea ua ora roa.

E tae aéra to'na matahiti i te ahuru ma maha, ua farii oia i te orama hanahana no te Metua e te tamaiti. Na mua mai i te reira, e rave rahi to'na mau hoa. Ua manaó Iosepha e, e mauruuru ratou i te faarooraa i to'na ra orama, o te faainoraa e te tahitohitoraa anaé râ ta'na i farii. Ua haamata atoa ratou i te hamani ino mai ia'na. Noa'tu i teie mau mea ino, parau noa'tu oia e, e parau mau hoi teie mau mea ta'na i faaite.

Ia paari oia ra, e tino etaeta e te maitai hoi to'na, e ono avae e hoé initi oia i te roa, e fatata e 90 kiro to'na faito, e mea afaro to'na haereraa, mai te tura e te mana hoi, ua i oia i te itoitoe e te mataú ore, e taputo maitai oia, e e tia oia i nia e ouá i nia aé i te raau teitei aé i to'na iho upoo. Ua marû oia i te mau taime atoa, aore oia i riri oioí.

I te hoé taime ua tapeahia Iosepha e te tahi mau taeae i roto i te fare auri i Missouri. I te pô ua faaroo noa ratou i te tuhi e i te parau faufau na te mau tiaí. Tia aéra Iosepha i nia, noa'tu te mau fifi auri, e i roto i te reó mai te patiri, ua na ô atura oia ia ratou, "A mamû outou, te mau demoni no te apoo o Hade: I TE I'OA O IESU MESIA te faahapa nei au ia outou. Eita vau e ora e hoé minuti faahou e e faaroo i tena parau, a faaore i te reira parau e aore râ, e pohe outou, e aore râ o vau e pohe i teie nei minuti." Ua faaoti oia i ta'na parau, e ua tia noa ra oia i nia mai te hió atu ia ratou, otemu ihora ratou, e ua tatarahapa ratou i mua ia'na, aita roa ratou i maniania faahou.

I te tupuraa o te varua ino i te rahiraa i nia iho ia Iosepha, e aita ta'na mau enemi i faaea e tae noa'tu ua taparahihia oia, ua opua oia ia faarue raua to'na taeae, o Hairamu i Navu, e haere i te toóá ó te râ e maa taime iti. Ua manaó oia e, o raua hoi tei hinaarohia e te mau taata haamani-ino,

e mai te mea e haere atura raua, eita e haapeapea-noa-hia te Feia Moá. No reira ua haere raua i tera pae mai i te anavai ra o Misisipi i te toóá ó te râ. I to Iosepha ma taeraa i reira, ua pari te tahi mau hoa haavare ia'na i te na ôraa mai e, "E taata mataú oia". Ua hoí maira Iosepha ma, mai te parauraa e, "Te hoí nei maua ia taparahihia, mai te mea e, aita to'u ora e faufaa ia ratou, aita'toa e faufaa ia'u nei." Hoí maira raua ia taparahihia no to ratou faaroo.

E RATA API MAI

Te vai ra te hoé taata taoá rahi, e e tamaiti to'na. Ua faarue râ te tamaiti i to'na metua tane, e ua haere oia i te fenua ê i te vahi atea roa. Hou iti aé râ i te taa-ê-raa, ua faaite mai te metua tane, e tauturu oia i te tamaiti mai te horoa'tu ia'na i te moni i te mau tau atimai te mea e papai noa mai te tamaiti i te mau rata i to'na metua tane i tera taime e i tera taime. Ua hope aéra e hoé ahuru e ma vanu matahiti, aita roa te tamaiti i papai i te hoé rata i to'na metua tane.

I te hoé mahana ua haere mai te hoé hoa no te tamaiti, e farerei ibora oia ia'na. Ua hinaaro taua hoa ra i te faatere i te hoé ohipa rahi. Aita râ ta'na e moni, e ua ani atura i te tamaiti ia papai oia i te rata i to'na metua e ani ia'na ia haponu mai i te moni.

Ua pahono mai te tamaiti, aita oia i hinaaro i te ani i to'na metua no te moni, no te mea aita oia i te huru o to'na metua i teie nei. Ua pohe paha oia, ua haere paha oia i te tahi vahi, ua vêvê paha oia i teie nei e aore râ e metua ê roa paha oia, e i reira ua faaite atu te tamaiti i to'na hoa i te huru o te faaueraa o to'na metua, e ua faaite atoa'tu oia, aita roa oia i papai i te hoé rata i to'na metua i taua mau matahiti e ahuru ma vanu ra.

E feruri maitai tatou i nia iho i taua aamu rii ra ei

reira, a pahono mai i teie uiraa. Eaha te hoé mea i titauhia ia faaitoito i te tamaiti i te ani atu i to'na metua no te tahi moni?

E hoé noa iho pahonoraa e au ai i taua uiraa ra, e o teie ia; Te hoé rata apî mai no to'na metua mai, mai te faaapî-faahou-raa i taua faufaa tahito ra.

Ahiri te tamaiti i farii i te tahi rata no to'na metua mai, o tei faaite faahou mai e, e tauturu te metua i to'na tamaiti mai ta'na i parau e hoé ahuru ma vau matahiti i mairi atu, aita roa ia te tamaiti i feaa faahou i te aniraa i to'na metua no te tahi moni.

E hoé tautani e iva hanere matahiti i mairi atu ua parau te Atua i to'na mau tamarii, e ua fafau oia i te hoé faufaa ia ratou i taua taime ra na roto i te mau ture o te Evanelia. E mamû roa aéra oia no na hanere matahiti e hoé ahuru ma vau ra. Ua feaa to'na mau tamarii ia ani atu ia'na i te rave i te ohipa mai ta'na i rave i te tau tahito. Ua ore to ratou faaroo e aita'toa ratou i tiaturi faahou i te Atua ra. Aita i pâpû ia ratou to'na huru mau, e ua moé paha to'na mau tamarii ia'na ra, e aore râ ua faahuru-ê-hia paha ta'na faufaa ia ratou. Ua faatura ratou ia'na i to ratou utu, area to ratou aau, tei te atea ê ia'na ra.

Inaha râ, i te matahiti 1830, ua tae faahou mai te tahi rata no te Atua mai, e i roto i te reira ua faaite mai oia e, aita oia i huru ê, te vai noa nei ta'na faufaa apî e te mau mea ta'na i haapîi i te tau tahito, e haapîi faahou oia i teie nei. O te Buka a Moromona ia taua rata apî ra. Ua tupu faahou te faaroo i te Atua i te mau taata tei farii i taua Buka ra. E ere te parau apî tei papaihia i roto i te Buka a Moromona, tera ra e mea apî mai taua Buka ra e ei faaitoitoraa ia no te mau taata tei farii i taua rata apî mai no te Atua mai.

—*Papaihia e Eduana*

TE PURE

Eaha ia te pure? O te pure ia te hoé aniraa, e te faaiteraa i te Atua i te mau mea atoa ta tatou i hinaaro, e faaiteraa atoa hoi i to tatou mauruuru no te mau haamaitairaa ta'na i horoa mai ia tatou nei.

E mea nafea te pure?

Ua na ô maira Iesu e, "Inaha, Amene, Amene, e parau atu vanu ia outou, e ara e e pure hoi ma te tuutuu ore e tia'i, ia ore outou ia roohia i te râmâ, i hinaaro na hoi Satani ia outou, ia uene oia ia outou mai te sitona e ueuehia ra; No reira ia pure outou i te Metua na roto i to'u ióa, ma te tuutuu ore e tiaí; E te mau mea ta outou e ani i te Metua i to'u ra ióa, o te tia ia, a faaroo ai e noaa taua mau mea ra, e noaa ia ia outou." (Nephi III 18: 18-20.)

Tera ia te parau ta Iesu i faaite mai i te ati Nephi no te pure.

Eita e nehenehe ia tatou ia faahapa i te tahi taata i roto i ta tatou pure.

Ua tia ia tatou ia ani i te Atua ia faaore i te hara i te feia hara, e tauturu ia ratou i roto i te vahi maramarama. E ani atu i te Atua ia faaore i to tatou mau hara e te mau hapehape rii i ravehia i te mau mahana atoa. Aore e tia ia tatou ia feruri e, e taata hara ore au.

Ua na ô maira Iesu e, "Eiaha e faaino atu, e eita outou e faainohia mai; eiaha e faahapa'tu, e eita outou e faahapahia mai; e faaore atu i te hara, e e faaorehia mai ta outou." (Luka 9 : 37.)

Mai teie te huru o te pure ta Iesu i haapii i ta'na mau pipi. "E to matou Metua i te ao ra, ia raa to oe ióa." Teie ia te auaa no tera parau. Te faaite mai nei te reira, te vai nei e Metua i te ao ra. E o tatou ia te mau tamarii na'na ra. E no reira e pure tatou i te Metua ta Iesu i pure atu, e Ióa Moá To'na."

"Ia tae to oe ra basileia. Ia haapaohia to oe hinaaro i

te fenua nei, mai tei te raí atoa na.” Ua ite tatou e, eita e nehenehe ia tatou e haapao ore i roto i te basileia o te Atua no te mea e, ua haapaohia te basileia o te Atua, mai te haapao maitai, e te mau ture a te Atua i nia iho i te fenua nei. Te reira ia te hinaaro a te Atua, e te reira ia te ravea e haapaohia to’na hinaaro i te fenua nei, mai tei te raí atoa.

“Ho-mai i te maa e au ia matou i teie nei mahana.” Ua ite tatou e, e nehenehe ia tatou e ani atu i te Atua no te maa, terara ua ite te Atua i te mau mea’toa e au ia tatou, e na roto i te aniraa e ite ai te Atua, ua ite te taata nei, na te Atua i horoa mai te mau mea’toa.

“E faaore mai i ta matou hara, mai ia matou atoa e faaore i tei hara ia matou nei.”

E nehenehe ia tatou atoa e faaore i te mau hape e i te mau hara no to tatou tupu mai te mea e, ua faahapahia tatou. Ua na ô maira te hoé irava i papaihia i roto i te Ephesia i te pene 4 e te irava 32.

“Ia hamani maitai outou ia outou iho, ma te aau marû aroha noa, ma te faaore hoi i te hara te tahi e te tahi, mai ta te Atua i faaore mai i ta outou i te Mesia ra.

Te na ô mai nei te tahi irava.

“Ia faaore hoi outou i ta vetahi ê ra hapa, e faaore atoa mai to outou Metua i te ao ra i ta outou. (Mataio te pene 9 te irava 14.)

“E eiaha e faarue ia matou ia roohia-noa-hia e te ati; e faaora râ ia matou i te ino. Eita e tia ia tatou ia feruri e, na te Atua e aratai ia tatou i roto i te mau ati, no te mea eita Oia e na reira, e paruru râ Oia ia tatou”.

E no reira, ia haamata i te pure na ô e tia’i. “E to matou Metua i te ao ra.” Ei reira e ani atu i te Atua no te mau mea e au ia tatou nei. Ei te faaotiraa. “Na roto i te Ioá o Iesu Mesia. Amene”.

—*Papaihia e Lito*

Te Bapetizoraa No Tei Pohe Ra

“Aore râ, eaha ihora te feia i bapetizohia no te feia i pohe ra, ia ore te feia i pohe ra ia tia faahou? Eaha ihora ratou i bapetizohia’i no tei pohe ra?” (Korinetia I 15:29)

Ua ui mai te aposetoro, o Paulo, i teie nei uiraa i ta’na aóraa i nia iho i te tia-faahou-raa. Ua ite oia na roto ia Iesu Mesia e nehenehe i te mau taata’toa ia ora faahou, oia hoi, ia tia faahou. E ua ite atoa hoi oia i te mau parau ta Iesu Mesia i faaite mai ia tatou nei.

“Ia ore te taata ia fanau i te pape e te Varua, e ore oia e ô i te basileia o te Atua ra. Ta te tino e fanau nei, e tino ia, ta te Varua e fanau ra, e varua ia. (Ioane 3: 5-6.)

Ua ite oia i te auraa o teie nei parau. E ua ite oia e, eita roa e nehenehe i te taata e ô i te basileia a te Atua, maori râ ua bapetizohia oia. Na roto i taua parau a Paulo ra, ua ite tatou e, ua haapaohia taua ohipa i roto i te Ekalesia a Iesu Mesia i te tau o Paulo ra. No reira, mai te mea e, ua rave ratou i taua ohipa ra, oia hoi te bapetizoraa no te feia i pohe, i te anotan a te mau aposetoro ahuru ma piti, te ani atu nei au ia outou na, e tia anei i te Ekalesia mau a Iesu Mesia ia faaore i taua ohipa ra i teie nei tau? Te pahono atu nei au ia outou, ata. Eita roa e tia i te Ekalesia a Iesu Mesia ia faahuru ê i ta’na mau haapiiraa e i ta’na mau faaueraa. E te parau atu nei au ia outou na, e mai te mea te vai nei te mau haapiiraa e te mau faaueraa huri ê i roto i te hoé Ekalesia nei, e ere ia te Ekalesia mau. E mai te mea te vai nei te Ekalesia, e aita ratou e haapao nei i te mau haapiiraa e i te mau faaueraa a Iesu Mesia, e ere atoa hoi ia te Ekalesia mau.

I teie nei, ua tia ia tatou ia feruri, e ia imi i te Ekalesia o te rave nei i te mau ohipa a te Atua, oia hoi te Ekalesia te haapao nei i ta Iesu mau faaueraa e i ta’na mau haapiiraa.

Te vai nei e hoé noa iho Ekalesia i teie nei ao te haa-pao nei i te bapetizoraa no te feia i pohe. Te vai nei e hoé noa iho Ekalesia i teie nei ao e aita oia i huru ê i te Ekalesia a te Atua i te tau a Iesu Mesia e ta'na mau aposetoro. E o tera ia te Ekalesia a Iesu Mesia i te Feia Moá i te mau mahana hopea nei.

A imi tatou i te mau haapiiraa a Iesu Mesia.

—*Papaiahia e Amona*

NO TE POHE MAIRA

I te po mahana Sabati i te pae no Atopa 1930, ua faaoti maitaihia ta matou haapiiraa hohoá no te amaa i Mahu i Tubuai, e na hoí te mau taata atoa i to ratou iho mau utuafare ia taoto. Te ua orometua Momoni râ o Lito raua o Lerani, ua faaea raua e taimé poto i te fare pureraa ia haapii i te pûpû gitara. Ua tae au i te fare no Teao, e ua iriti au i to'u pereue, e te paraparau ra matou, oia hoi te hoé pae o te mau taata tei faaea i taua fare ra. Ua tomo maira Taroa, (e taata i bapetizohia i taua mahana ihora), ua na ô maira oia, "E mauui rahi to Teta." Ua tia matou i nia e ua haere atura matou i te fare tutu i te vahi i faaea'i teie tamahine. No te rahi o te mau taata tei putu-putu maira, aore au i tomo i roto. Ua faaroo noa vau i te mau taata i te parauraa e, "a tamata i teie raau, e a tamata i tera." Ua faaroo atoa vau i te tahi pae i te parauraa e, "te pihaé nei oia i te toto." Ua parau maira te hoé taata "tera ió aéra te taote, e raau anei ta'na?" Tei pihai'ho Nina ia'u, ua faaroo vau ia'na i te parauraa, "e taote tera na teie nei ao, te vai nei te TAOTE RAHI." E oia mau atura.

Ua hoí faahou van i to matou fare e ua parahi au i raro ia feruri i te mau mea ta'u i ite e ta'u i faaroo ra. Tei te

fare tutu te hoé vahine tei fatata i te pohe, tei reira hoi te mau taata e rave rahi o tei raapan ia'na i te mau mea faufaa ore o teie nei ao. Te paruparu noa ra oia noa'tu te rahiraa o te raau tei faaamuhia ia'na. Aore to, na aho i hutihia, e maa taime iti, e ua huti-paruparu-faahou-hia. Ia parau na hoi ratou ia'na aore oia i pahono mai. Ua horo Teuruhina pihai'ho ia'na, parau atura ia'na, "E Teta; E Teta; Aore anei oe i hinaaro i te faatahinuhia?" Ua parau maira oia, "E." Aita râ i taa maitai ta'na parau. Ua hoi mai Lerani i te fare, e tei te pae opani oia i te fare tutu i horo mai ai Teuruhina, e na Teuruhina i faaite atu ia'na. Ua faaroo Viri ia'na i te parauraa, e ua horo maira oia ia'u, na ô maira, "A haere mai, haavitiviti, na Lerani i parau mai." Ua manaó ihora vau, ua pohe roa Teta. Ua haamata vau i te haere atu, e ua farerei maira Lerani ia'u, na na ô maira, "Te hinaaro nei oia ia tatou ia faatahinu ia'na." Ua rave au i te mohina olive e ua haere maua. Ua faaue atu vau i te mau taata atoa ia haere i rapae i te fare, maoti râ ta'na tane e te metua vahine na to'na tane, e te na metua no teie tamahine, e te hoé nau taata tei tapea ia'na. Ua parau atu vau i to'na metua tane, o Teao, ia tauturu mai. Ua imi oia i to'na piripou e i to'na pereue ia oomo. A oomo ai oia i to'na ahu, aore au i te i taua tamahine i te huti i to'na aho, e a parau ai na hoi ratou ia'na aore roa oia i pahono mai, e ua toétoé roa to'na tino mai to te taata pohe ra. Ua taupe to'na upoo i raro e aore to'na tino i etaeta faahou. Ua faatahinu Teao ia'na. Ua tuu matou, o Lerani e o Teao, i to matou pue rima i nia iho ia'na, e i te ióa o Iesu Mesia e no to mana o te Autahuárag ua faaue atura vau i te maí ia haere i rapae ia'na, e ua faaue atura vau ia'na, "E faaitoito, aore ta oe ohipa i oti, te vai noa ra te ohipa na oe". Ia oti te faatahinuraa ua parau atu vau ia ratou, e tamahanahana i te hinu olive.

Te tapea ra Tinomana ia'na, e ua faaroo vau ia'na i te parauraa, "E Teta, E Teta! A haamanaó oe i tei parauhia mai ia oe." Ua faaroo vau i te reó iti e te paruparu e te taa ore, mai te huru e, te parau ra oia, "E, te haamanaó nei au."

Ua tapea vau i to'na rima, e no te paruparu rahi o to'na mafatu, aore i taa ia'u te hautiraa o to'na uaua. Ua haamata matou i te taurumi i to'na ouma e i to'na rima i te hinu olve mahanahana. Ua tapea faahou vau i to'na rima, e ua hauti rii to'na uaua, e mea paruparu roa râ. Ua faaitoito matou i te taurumi ia'na i te hinu olive. E piti ahuru minuti i muri aé, ua au maitai to'na huru. E piti hora i muri aé ua haere au i pihai'ho ia'na, e te taoto ra oia e ua afaro te hautiraa o to'na uaua e te hutiraa o to'na aho.

I te poipoi aéra, te paraparau ra matou i nia iho i te mono no Teta, no ta'na tufaa i roto i te haapiiraa hohoá. Ua parau maira Teta, "E rave ia vau, o to'u ia tere i haere mai ai." I taua mahana i hora ua hopu oia i te pape, e i te po ua haere na raro uoa oia e tae atu i te fare pureraa, e ua rave oia i ta'na tufaa no te haapiiraa hohoá. E homa; te faaite atu nei au mai to'u manaó tia mau, e mai to'u ite mau i teie ohipa i te tupu, ua ite pâpû roa hoi au, no te pohe maira tera tamahine ua roto ra i te mana ta te Atua i tuu mai i te taata nei, na roto mai i Ta'na mau taviini i teie tau hopea nei.

—*Papaihia e Edua*

Te Mau Parau Apî

NA TO TE TUAMOTU: E tupu mai to outou maururu, ia ite outou e, ua oti ia Vito Rau te mau buka to-mite fenua no te pae Tuamotu taatoa.

Ua riro atura ia ei ohipa ohie ia'na i te imi na tei hinaro, i ta ratou mau tomité; no reira, e mea tia roa i te mau fatu fenua tei ore i roaa ta ratou mau tomité, ia haere ia'na ra no taua vahi ra, e ia rave atoa mai hoi i ta ratou mau parau faturaa no roto mai i te piha tomiteraa fenua.

E PATOIRAA

Te patoi nei te ati Iuda i te hoé ohipa i ravehia e te Hau Baratane. Tei te Hau Baratane te mana no te faa-tereraa i te ohipa i roto i te Fenua Moá, oia hoi i roto i te fenua ra i Kanaana. E ua faaite mai te Hau Baratane i to'na hinaaro ia faaore i te mau haereraa o te ati Iuda i Ierusalema e i Kanaana. Ua faaite mai te ati Iuda no Baratane, no Amerika, no Rusia, no Rumania, e no Poland i to ratou mauruuru-ore-raa i taua ohipa. E te imi nei te ati Iuda no taua mau hau ra i te ravea ia faatia te Hau Baratane ia hoí ratou i to ratou fenua aiá.

Te tumu i faaitehia mai e te Hau Baratane no te tapea-raa i te ati Iuda i te hoí i to ratou fenua ra o Kanaana, no te mea ua iti te mau tufaa fenua toe no te parahiraa o te ati Iuda. Ua rahi te mau taata i parauhia o Arabia i reira. E te faahapa nei te Arabia i te mau ati Iuda tei haere i Kanaana, no te hoé tau ati tei tupu i reira.

I roto i Baratane e i Rusia atoa hoi, ua putuputu te ati Iuda e rave rahi, e ua orurehau ratou. Ua haapurarahia râ taua mau ati Iuda e te mau mutoi o taua na Hau ra.

E mea rahi te mau taata toroa i Baratane o tei ore i mauruuru i te ohipa a te Hau Baratane e te tauturu nei ratou i te ati Iuda ia roaa ia ratou o Kanaana no ratou iho.

Noa'tu te ohipa a te Hau Baratane, te faaineinehia nei te mau mea i roto i te fenua i Kanaana no te hoíraa o te ati Iuda. Te faaapu nei ratou i te fenua e te hamani nei ratou i te mau purumu, e te faatia atoa nei hoi ratou i te hoé fare rahi no te hamaniraa i te mana uira. E hau te rahi o teie huru fare i to te tahi mau fare mai teie te huru i te tahi mau vahi i Europa. Na te pape tahe o te anavai ra o Ioridana e taviri i te mau machine i roto i taua fare no te hamaniraa i te uira ra.